

# CROESO I BWYLLGOR CYNLLUNIO CYNGOR SIR DDINBYCH

## SUT Y CYNHELIR Y CYFARFOD

Oni bai y bydd Cadeirydd y Pwyllgor yn dweud yn wahanol, bydd trefn y prif eitemau a drafodir yn dilyn y rhaglen a nodir ar ddechrau'r adroddiad hwn.

### Cyflwyniad cyffredinol

Bydd y Cadeirydd yn agor y cyfarfod am 9.30am ac yn croesawu pawb i'r Pwyllgor Cynllunio.

Bydd y Cadeirydd yn holi a oes unrhyw ymddiheuriadau am absenoldeb a datganiadau o gysylltiad.

Bydd y Cadeirydd yn gwahodd Swyddogion i wneud cyflwyniad byr i'r materion sy'n berthnasol i'r cyfarfod.

Bydd Swyddogion yn amlinellu eitemau fel y bo'n briodol, ble byddwn wedi cael ceisiadau am ohirio, eu tynnu'n ôl, adroddiadau arbennig ac unrhyw eitemau Rhan 2 lle gellir gwahardd y wasg a'r cyhoedd. Cyfeirir at wybodaeth ychwanegol sydd cyn dechrau'r cyfarfod, yn cynnwys sylwadau hwyr/taflenni crynhoi diwygiadau ('Taflenni Hwyr') ac unrhyw gynlluniau ategol neu ddiwygiedig yn ymwneud ag eitemau i'w hystyried.

Mae'r 'Taflenni Hwyr' yn cynnwys gwybodaeth bwysig, yn cynnwys crynodeb o'r deunydd a dderbynnir mewn perthynas ag eitemau ar y rhaglen rhwng cwblhau'r prif adroddiadau a'r diwrnod cyn y cyfarfod. Mae'r taflenni hefyd yn gosod trefn rhedeg arfaethedig ceisiadau cynllunio.

Mewn perthynas â threfn eitemau, bydd disgwyl i unrhyw Aelodau sy'n ceisio symud eitem yn ei blaen i'w hystyried, wneud cais o'r fath yn syth wedi cyflwyniad y Swyddog. Rhaid gwneud unrhyw gais o'r fath fel cynnig ffurfiol a bydd yn destun pleidlais.

Mae'r Pwyllgor Cynllunio yn cynnwys 21 Aelod etholedig ar hyn o bryd. Yn unol â phrotocol, rhaid i 11 Aelod fod yn bresennol ar ddechrau trafodaeth dros eitem i wneud cworwm ac i ganiatáu cynnal y bleidlais.

Gall Aelodau'r Cyngor Sir nad ydynt wedi'u hethol ar y Pwyllgor Cynllunio ddod i'r cyfarfod a siarad am eitem, ond nid ydynt yn gallu gwneud cynnig i roi neu wrthod cais, neu bleidleisio.

## YSTYRIED CEISIADAU CYNLLUNIO

### Y drefn i'w dilyn

Bydd y Cadeirydd yn cyhoeddi'r eitem a fydd yn cael sylw nesaf. Mewn perthynas â cheisiadau cynllunio, cyfeirir at rif y cais, y lleoliad a sail y cynnig, yr Aelodau lleol perthnasol ar gyfer yr ardal ac argymhelliad y Swyddog.

Os yw unrhyw Aelod o blaid cynnig gohirio eitem, yn cynnwys caniatáu bod y safle'n cael ymweliad gan y Panel Arolygu Safle, dylid gwneud y cais, gyda'r rheswm cynllunio dros ohirio, cyn unrhyw siarad cyhoeddus neu drafodaeth dros yr eitem honno.

Lle bo'n berthnasol, bydd y Cadeirydd yn cynnig y cyfle i Aelodau ddarllen unrhyw wybodaeth hwyr am eitem ar y 'Taflenni Hwyr' cyn symud ymlaen.

Cyn unrhyw drafodaeth, gall y Cadeirydd wahodd Swyddogion i roi cyflwyniad byr am eitem lle ystyrir hyn yn werthfawr o ran natur y cais.

Bydd y Cadeirydd yna'n cyhoeddi y bydd yr eitem yn agored i'w thrafod ac yn rhoi'r cyfle i Aelodau siarad a gwneud sylwadau ar yr eitem.

Os yw unrhyw gais wedi bod yn destun Panel Arolygiad Safle cyn y Pwyllgor, bydd y Cadeirydd fel arfer yn gwahodd yr Aelodau hynny a oedd yn bresennol, yn cynnwys yr Aelod Lleol, i siarad gyntaf.

Gyda phob cais arall, bydd y Cadeirydd yn caniatáu'r Aelod(au) Lleol i siarad gyntaf, pe bai ef/hi/nhw yn dymuno.

Mae Aelodau fel arfer yn gyfyngedig i uchafswm o bum munud o amser siarad, a bydd y Cadeirydd yn cynnal y drafodaeth yn unol â'r Rheolau Sefydlog.

Unwaith y bydd Aelod wedi siarad, **ni ddylai siarad eto** oni bai y ceisir eglurhad am bwyntiau sy'n codi yn y drafodaeth, ac yna dim ond wedi i bob Aelod arall gael y cyfle i siarad, gyda chytundeb y Cadeirydd.

Ar gasgliad trafodaeth yr Aelodau, bydd y Cadeirydd yn gofyn i Swyddogion ymateb fel y bo'n briodol i gwestiynau a phwyntiau a godwyd, yn cynnwys cyngor ar unrhyw benderfyniad sy'n groes i argymhelliad.

Cyn mynd ymlaen i bleidleisio, bydd y Cadeirydd yn gwahodd neu'n ceisio eglurhad am gynigion ac eilyddion o blaid neu yn erbyn argymhelliad y Swyddog, neu unrhyw benderfyniadau eraill yn cynnwys diwygiadau i gynigion. Lle mae cynnig yn groes i argymhelliad Swyddog, bydd y Cadeirydd yn ceisio eglurhad o'r rheswm/rhesymau cynllunio dros y cynnig hwnnw, er mwyn cofnodi hyn yng Nghofnodion y cyfarfod. Gall y Cadeirydd ofyn am sylwadau gan Swyddog y Gyfraith a Chynllunio ar ddilysrwydd y rheswm/rhesymau a nodwyd.

Bydd y Cadeirydd yn cyhoeddi pan fydd y drafodaeth yn cau, ac y bydd pleidleisio'n dilyn.

## Y drefn bleidleisio

Cyn gofyn i Aelodau bleidleisio, bydd y Cadeirydd yn cyhoeddi pa benderfyniadau sydd wedi'u gwneud, a sut y bydd y bleidlais yn digwydd. Os oes angen, efallai y bydd angen rhagor o eglurhad am ddiwygiadau, sylwadau newydd neu ychwanegol a rhesymau dros wrthod, fel nad oes amwysedd ynghylch beth mae'r Pwyllgor yn pleidleisio o'i blaid neu yn ei erbyn.

### **Aelodau sy'n mynychu dros Zoom**

Bydd y bleidlais yn mynd yn ei blaen wrth i'r Cadeirydd fynd o amgylch pob aelod o'r Pwyllgor Cynllunio sy'n gymwys i bleidleisio i ofyn am eu pleidlais "O blaid", "Yn erbyn" neu "Ymatal". Bydd y pleidleisiau'n cael eu nodi.

### **Aelodau sy'n mynychu'r Siambr**

Bydd yr Aelodau'n defnyddio'r system bleidleisio electronig a bydd y Cadeirydd yn darllen y canlyniad yn uchel.

### **Canlyniad Terfynol**

Bydd y Cadeirydd yn cyfri'r pleidleisiau ac yn cyhoeddi a yw'r cais wedi cael ei gymeradwyo neu ei wrthod.